

稗史叢書之四

太平天國新聞

上海進步書局



太平天國軼聞

卷三

包立身

包立身居紹興諸暨之包村。世務農業。而曾習奇門遁甲術。能料敵之進退虛實。而制其命。咸豐辛酉。粵兵擾浙。包聚村人練兵籌餉。竟以一隅之地。當數十萬方張之敵。屢挫兇鋒。終不少屈。於是人始知其有異能。依倚者日衆。時吳曉鵬觀察方以蘇松兵備攝藩篆。吳亦浙人。聞其異。欲招致幕中。以爲己助。因於佐雜班中訪得包之姑表兄弟馮仰山。潛令蓄髮三月。乃備文書。改衣裝。命赴包村致意。時浙境徧地皆賊。馮逡巡不敢遽入。適遇被擄逸出之素識某。探知前路賊守將性暴好殺。手下盤詰最嚴。斷難混過。惟包村有勇目某。常雜處賊中。現居某地。然必繞道二百餘里。始能曲達。馮晝伏夜行。三日夜至某所。既見。卽述來意。某以此去包村雖不遠。然賊守

甚衆。去必成擒。因藏馮密室。不令外出。一日謂馮曰。今已覓得路憑。且有賊卒二。賄令護送。然文書當留此。斷不可帶。卽日付憑促往。馮行果有二賊前導。途中屢經要隘。鋒刃奪目。心膽幾碎。歷數日夜。去村不過二三里。二卒辭去。馮單身前進。過村中。巡勇疑爲賊細作。欲殺之。馮以包某至戚告。遂引馮入見。各道艱苦。馮見眷族亦在。包村皆無恙。喜甚。因備述吳公所招意。包歎曰。我亦知孤村無援。勢難久守。緣無長策。勉酬衆志耳。刻下軍糧僅支二月。幸有賊之通我者。私接濟。不然斷已久矣。今承吳公美意。奈賊衆我寡。恐難突圍出也。因與掌案某共議。某以賊勢甚大。媚賊者衆。馮某雖親。遠出已久。又無文憑。君雖信之。奈衆人何必使人隨馮出村。取文書示衆。衆志旣堅。然後刻期衝圍。并約吳公統兵接應。始爲萬全。事關一村民命。斷不可草草從事。包是之。馮因暫留包村。閱二旬餘。值夜大雨。包忽命護勇六人。身穿賊服。送馮出村。馮欲挈眷。包卜曰。可遂帶家屬冒雨行。黑暗中見無數皂衣紅帽人。僵立村外。似守護者。而寂無聲息。馮怯甚。私問送者。此何兵。勇但搖手。遂繞小徑行。至舊處。

卽取文牒付勇。囑包速定行期。而馮自歸。包旣得牒。邀衆密議。則皆願從。包大喜。卽布卦以占。卦成。又大驚。曰。細察卦象。惟今夜二鼓可出。若交子正。卽無可出之日。且有大禍。衆皆失色。僉曰。今浙地四處皆賊。又未約有援兵。縱使突圍而出。將何所歸。時有掌文案某曰。離此百二十里。地名岔河口。某處地僻。可以屯軍。河闊可通海道。聞無賊守。若暫紮營彼處。卽由海道通信吳公。使以輪船接應。或可轉危爲安。除此恐無良策。包曰。我方寸已亂。不能自主。但今勢已至此。不出亦難持久。姑從某先生言。死生命也。諸族可速歸。各自收拾。時已薄暮。雨方霽。而陰雲未開。村路尙濕。遙聽賊營寂靜。號礮無聲。卽傳集團勇四千人。按旗色分作五隊。隊各八百人。選勇敢者入紅旗隊爲前鋒。令酉初出隊。各帶衣糧鍋被。由西北方進攻賊北營。衝透賊圍。於某村取齊。白旗繼之。皂旗殿後。中權青黃兩隊保護衆家族。傳令旣畢。時值戌初。紅旗隊已發。遠聞金鼓震天。鎗礮聲不絕。而一村之人亦遽亂如潮湧。聚哭包門。曰。包君若去。我等從亦死。不從亦死。惟留包君。或可苟延旦夕。一時人聲鼎沸。包欲出而

爲衆所阻。歎曰：「天乎！命耶！」時將錯過，不能逃也。因令後隊且勿進。時白旗隊亦已出村。以聞令欲退，致前後不相顧。隊伍遂亂。忽見四野火光燭天，殺聲動地。敵衆大至，亂拋噴筒、火箭、鎗礮，齊發鉛丸如雨。村勇各無鬪志。又值村衆擾攘之際，敵遂乘勢衝入。見屋卽火，逢人便刃。頃刻間煙燄滿村，屍如山積。時惟紅旗隊已衝圍而出，白旗生死參半。餘衆鮮有得脫，而包與同事諸人皆死與敵矣。先時賊患包甚，檄調各路精銳，誓破包村。是日調兵適至，入夜陡聞村中人聲四騰，賊慮乘夜劫營，方發號聚衆，而紅旗隊驟然衝至。敵賊素聞包有異術，且以月黑路滑不敢追逼。又意村人絕糧夜遁，村中必虛，因而并力進功，致爲所破。然後知數之難逃有如此云。此皆聞之友人。友蓋得諸馮某。及是日幸免者所述，并云馮在村時，每晨起見包必登高望氣。旣下，卽令衆曰：「今日賊來自某處，將攻我某方，當撤他防，并力禦之。」繼而果然屢試不爽。所練之勇，能禦敵者三千餘人，以五色旂按五方分五隊，進退有常。臨陣不亂，常邀馮共瞭賊營，忽推馮倒身亦伏地。方伏而霆震一聲，礮子簌簌從上飛過。旣

免。謂馮曰。此礮在良方。月神適犯我村。當去之。馮見礮架前山麓。約遠四五里。有賊守衛。私忖如何可去。繼見包脫帽散髮。跣足仗劍。如道家步罡狀。選勇目。衣皂隨行。包口喃喃若誦咒。其行如飛。將及而遙見一賊忽撲地。餘賊盡退。瞬息間礮已取歸。約重四五百觔。不知三人之力。何能勝任如此也。時方涉冬。天久不雨。包忽令衆曰。久不與賊戰。賊必謂我兵單怯敵。明日某時。當有大雨。賊守必怠。可衝破其行營。雖不能大勝。亦可殺敵數百。獲牲口器械。以挫凶鋒。乃預傳令。何時出隊。何時攻營。何時收隊。明日果大雨。破敵一如所言。時敵欲由溫台攻閩省。患包牽制。願以紹興府城與之。請其不助官軍。或言若得府城。足資守禦。勸包姑從。包笑曰。此誘我也。無論江浙俱陷。孤城難守。且入城則如困圉。糧草更易斷絕。扼吭之勢。恐無一人可逃也。遂斬其使。馮嘗竊問包曰。弟與君自幼同堂共學。弟以薄宦。遠離鄉井。聞君素守田廬。罕至城市。何時得靈飛六甲十二真傳。而道妙至此。包曰。余於念年前。曾遇異人。授我祕冊。雖非全帙。然上觀天象。能知風雲雷雨。時運變遷。下察地理。則可安營。

布陣。縮地驅山。而凡卜易算數之類。吉凶禍福。皆可預決。前取敵礮。即六丁縮地法。故三人能得數十人之力。但我所學。不過顯易數端。若能盡其底蘊。則此小醜。指日可除。何至困於此耶。馮又問賊勢至此。何日得平。包曰。我曾觀星象。兼占易數。江浙之賊。不久當滅。惟自占此村之吉凶。家族之安危。反不能了了。是豈學之不精耶。抑所謂馬前易數。近易明而遠難驗耶。及包死。馮始知數有前定。故占不而明。因爲之歎詫累日。後嘗以其所聞見者述於人如此。方蘭太守垞云。紹興包立身實農家子。初無異人處。但形體甚長。高於常人者幾二尺許。食粟而已。不識一字。其他更勿論也。咸豐間紹興有趙氏者。富人也。生一子。廣穎方頤。耳垂肩。手過膝。術者諛之。謂有帝王相。趙翁因之蓄異志。見立身奇其狀。曰。此可藉以惑衆也。乃密招之來。寘諸後園中。人無知者。乃日課以識字讀書。并啖以大力丸。又使人教以諸兵器用法。如是者兩年餘。乃以夜半縱之出使歸。其家久失立身。一旦忽得之。宗族鄰里咸集問訊。立身曰。吾遇仙人。招入山中。授我兵書戰法。異日當爲大將也。其言蓋亦趙翁教之。

者。衆咸不信。試授以書則能讀。授以刀則能舞。與平時絕異。乃大詫曰。仙矣。仙矣。包神仙之名。從此而起。及後事敗。趙翁父子亦同死包村中。

張炳垣之謀內應

張繼庚字炳垣。江寧諸生。粵賊初破江寧。炳垣欲自盡。旣而曰。徒死無益。遂降之。改名葉子法。處之機匠館中。同郡吳畏堂。初客漢口。與漢陽令趙公德轍故相識。至是吳亦陷賊。而趙公擢授江寧府。炳垣因與畏堂謀。賄守門賊。通書趙公。約內應。趙爲言於向公。許之。炳垣先後上書三十六函。初議入朝陽門。賊酋忽將守門賊調赴他處。而別遣廣西長髮者守之。乃更約取道後湖。以草船伏人而進。賊酋微聞之。周湖築土城。防範甚密。於是計不果行。同謀有張沛澤者。廣西人。見事不就。背之去。炳垣乃復與張鵝頭約。鵝頭故無賴子。感炳垣意氣。私結儕輩百餘人。願以一死相報。計定。炳垣託故出城。親謁向公。極陳江寧可破狀。約大兵夜集儀鳳門。則城內開門納之。公付以免死牌五千紙。定議待期舉行矣。沛澤故知其謀。見鵝頭炳垣數相語。曰。

予我千金。不爾當發其事。炳垣曰。吾安所得千金者。沛澤果以白賊立逮。炳垣拷掠備至。同館人曰。內應首謀實爲張氏繼庚。此葉子法。非爲叛者。獄稍緩。而秀清改命賊酋胡元偉承審。元偉故廬州太守。陷江忠烈公於死。而以城降賊者也。嚴刑酷法。至燒鐵烙體。刺猪鬃乳中。炳垣憤恨不能忍。曰。他人問。吾無可承。公乃大清堂堂四品官。吾亦公祖部民也。當以實供。內應事大。非一二江寧人所能。皆由廣西老賊首謀。且人多。吾不能記。請以簿至。胡顧左右取僞官冊。炳垣指一廣西人曰。此同謀者。卽逮其人殺之。又指一人曰。此知情者。又殺之。殺至三十餘人。秀清曰。已矣。墮其計矣。彼所指皆老兄弟。非實情也。勿復問。遂用車裂法。繫炳垣手足及首。鞭五馬而馳之。左手右足先斷。首次之。餘體又製爲二。觀者皆掩泣。鴉頭聞之曰。嗟乎。吾旣以死許張公。畏禍食言。非丈夫也。且張公以數言殺賊數十。而不一語及我。望我成其志耳。我必圖之。時賊衆稽察嚴密。各城增設木柵數重。及期。鴉頭率其黨殺守門賊七人。而無計越柵開城。官兵夜至不得入。明日賊中大索殺人者。久之無左驗。事將寢。

矣。鴉頭過所善沈獸醫飲酒酣大言曰。前日大難。七人者我所殺也。獸醫首其事。復殺鴉頭。自是城中無敢謀內應者矣。後獸醫以事出城。鄉民戮之。沛澤卒亦見殺於賊云。天河生聞諸李芝生曰。張先生上軍書。率由芝生代傳。三十六函存其廿四。他日謀爲刊之。當夫嚴刑逼供之日。豈不知一死無所逃免哉。無而骨肉齎粉。忍死不承。冀萬一獲全。猶有後望。卒用計殺賊多人而後罷。可不謂烈丈夫哉。機事不密。英傑淪亡。又爽無失矣。

張炳垣傳

管小異所撰張炳垣傳。與金陵癸甲撫談所紀張炳元事詳略互異。蓋小異與炳垣素交。故知其家世名字踪跡甚悉。癸丑秋出城。雖在此事之前。而事後得之逸出之同志所述甚確。癸甲撫談据小異言。爲蕪湖諸生謝某字介鶴者所箸。初亦陷賊。其出城後于小異一年。然與炳垣不相識。事由傳聞。容有異辭。其書已刊行。世當有見者。今錄小異傳文。以備後之紀事者參攷焉。傳曰。張繼庚字炳垣。江寧府學廩膳生。

性深多謀。自幼善會計。貧而能自振。湖南布政司使潘公鐸。與其父故湖南桃源縣知縣介福。爲同年生。君往依焉。潘公甚器重之。值湖南軍興。君以省母辭歸。未幾賊犯武昌。東下金陵。戒嚴布政使祁公宿藻。聞君諳兵事。呼與語。大悅。凡祁公所舉防堵團練諸政。君陳說爲多。無何城潰。君陷賊中。里人吳偉堂。賈漢上。久楚賊。多素所識。佯受僞職。而實陰圖反正。君偵知其情。遂因吳君與諸僞官結納。爲忘形交。一日謂諸僞官曰。公等毀家室。去鄉里。身經百戰。攻下數十城。以有今日。然祿才足果腹。父母妻子不相見。以公等之才。何事不可爲。乃鬱鬱久居此也。皆不答。有泣下者。君知其心動。遂反覆勸以反正。且曰。事成。公等受上賞。不成。請殺我與吳君。以爲說。皆感諾。於是君與吳君糾合鄉人數千。諸僞官又許各率所部以應之。君密陳欽使向公。請期進兵。而已爲內應。欽使許之。四年二月壬辰。君率衆登城。殺守城賊爲號。時官兵已抵城下。適賊新設木柵。襲城門內。扁鑄甚固。君啟城稍遲。官兵疑慮不敢進。整隊而退。君知事不就。急令各向賊館。以泯其跡。爲後圖。時賊亦倉猝不知起事端。

倪無從究詰。有劉鴉頭者。君所募健兒也。隸賊官沈獸醫下。慮事泄。禍且不測。欲逸去。賊法凡因事出入。皆有僞官符券。以爲憑信。謂之關憑。非是。則守城賊拒不令出入。劉恃沈素同里閭。當援已。密以情告。冀得關憑。爲脫身計。沈賺得事實。遂以報于僞東王楊秀清。拘君至。詰同謀。鞭撻炮烙。備極慘酷。君詭承楚粵黠賊。不與其謀者。秀清疑曰。汝所糾。獨無江寧人耶。君應曰。江寧人素軟弱。不足與圖大事也。于是賊誤殺其黨百數十人。然卒斃君於杖下。復裂其尸。以徇。上元諸生賈鍾麟與是謀。聞難逸出。投大營。陳君死狀。欽使聞之。嗟嘆泣下。許以其事聞于朝。是役也。炳垣糾合六省之衆。謀之半年而後發。親至大營。陳說機宜。書狀絡繹。賊中竟無知者。幾事可謂密矣。時會不至。卒隕其身。哀哉。余至西善橋。聞村人言。劉鴉頭被執事。謂人曰。事泄由我。願以一身當之。寧死不波累人。所以報張君也。及被擄掠。無完膚。矢口不吐。同謀一人。炳垣至。教之曰。汝盍誣稱沈獸醫同謀。賊必並殺沈。不猶愈于徒死乎。劉從之。沈聞劉反噬已急。遁去。賊信沈果與謀。購捕甚急。時城外官民聞沈媚賊憤時。

事皆切齒。亦懸金購之。沈夜伏林箐間。皇懼無措。自投村民求救。村民縛送大營。支解之。賊亦殺沈黨與在城內者數十人。炳垣事雖不就。然自是羣賊互相猜疑。輒自戕殺。勢始渙散。旬日間。反正者不可勝計。厥功亦偉矣哉。按反正之謀實發端于吳中。未叙及此。失于檢點處。偉堂事敗後。吳之生死傳。

金陵汪馬二秀才事

汪君星垣。性好清潔。與清涼寺僧稔交。城陷後。屏居寺中。一日僧報曰。賊至矣。君危坐不爲動。與僧並爲賊所執。僧獻所有獲免。并欲救汪。給賊曰。是吾寺中供糞除者也。賊將釋之。君厲聲曰。否。吾秀才汪某也。賊以戈擬其喉。僧又給賊曰。是有心病。君厲聲曰。否。我無病。我秀才汪某也。賊奇而禮之。且曰。吾視君非凡人也。髮斑白矣。猶困于諸生。方今天下大亂。豪傑有爲之時也。盍變計從吾乎。君大罵曰。狗奴。吾所以困躓者。爲不肯變計諧俗也。況肯從賊乎。遂遇害。氣垂絕。猶自呼殉難者。上元縣秀才汪某也。同時又有馬秀才者。販牛爲業。素不齒于鄉里。聞城陷。慨然誓死。謂其弟

曰。吾聞功不在大。吾與若匹夫也。殺一人而死。足以自償。若殺二人。則是爲國殺賊而死也。可謂立功矣。因詭迎賊入。使其弟守外戶。乘賊不意。取所用屠刀潛殺之。投之于井。賊續至復然。日殺四五輩以爲常。旣謂其弟曰。戮有罪而不使人知。不武。因榜賊首于門。爲他賊所知覺。遂與其弟皆遇害。此二事亦小異所記。小異謂汪君順受其正矣。然不如馬君立功爲尤難。余意汪義不從賊。馬志在殺賊。以史例論。並可附張繼庚傳後。無容軒輊也。

布衣胡文忠

安徽布衣胡文忠。當賊破定遠時。家毀於難。鬻其女。隻身赴京師。謂林遠村侍御之望曰。督師者久無功。又驕縱好聲色。皖名城多陷。苗沛霖跋扈。反形日露。督師者若不知。民無生望。使前督師者終不去皖。何至是。前督師者袁甲三也若有言責。當入告。侍御唯唯。胡不及待。遂自縊死。死猶懷書責林。語益激。林乃並書疏聞。未幾。督師者以母喪詔許來京。而復以前督師者往。見許宗衡玉井山館筆記。

金陵之士節

洪楊踞金陵。士夫陷其中者。多以節烈著聞。楊秀清嘗設策開科。逼多士賦詩。題曰四海之內皆東土。有諸生鄭之僑者。作詩痛詆。起句云。四海皆清土。安容鼠輩狂。人皆思北闕。世忽有東王。楊大怒。支解之。廩生張繼庚。佯與賊暱。結爲內應。七上書向忠武公。復親謁公營。圖反正。會大雪失期。會事洩被拘。賊窮治黨。與榜笞刺戮。身無完膚。終不累一人。賊復餌以甘言。乃請示官冊。指其悍者三十餘人。賊皆立斬之。既而悟。始磔君。君臨刑作絕命詞。有云。拔不去眼下釘。嘔不盡心頭血。吁嗟窮途窮。空抱烈士烈。殺賊苦無權。罵賊猶有舌。詞及上向公書。江甯人至今猶傳誦。又諸生夏宗鑑者。賊脅就試。終卷有罵賊語。亦被磔。又張君同謀。金和賈鍾麟。李鈞祥。何師孟。皆諸生。韋布嘗引官兵入伏城中。夜起殺賊。以有備不得逞。後不知所終。

陳貞卿

賊首李天福攻打青巖山。賊夥萬餘。紮營王欽庄。兵董陳貞卿。字燮煌。年未弱冠。智

勇過人。選擇精兵數千。分地把守。共分一百七十五隊。每隊精兵三十名。歸董理兵董數人。出令立法。不得退避落後。如不遵令。軍法從事。以肅兵規。并辦拾鎗數十具。與髮賊死戰。將臺鎗放去。打死李天福賊首數十人。又戮殺賊夥數十人。賊遂喪氣退敗。董理議賞兵董陳眞卿銀洋千元。眞卿不受。曰。同衛鄉里。此是吾分。何敢言賞。鄉人皆高其義。賊乘三更時。到馬安岩邊偷營。眞卿時時在城巡守不懈。隨時將台鎗開放。賊知青岩終不可破。卽遁去。未幾而東陽之賊退矣。又未幾而金華與全省之賊亦俱退矣。海內肅清。復見天日。而是山之靈異。賴以全活者數萬人。其爲功於民何如也。

神童馮福基

馮福基。代州人。幼隨父焯潛山縣天堂巡檢任。九歲解周易大義。衆稱神童。咸豐七年。賊犯潛山。福基年十四。匿母他所。藏利刃奮身出。賊執之。思刃其脅。弗得。隨賊至黃梅。宿藥肆。夜竊藥置賊飯裏中。賊中毒死者十七人。懼事泄。吞餘藥而瞑。賊委去。

越二日。福基蘇。自度必不活。寓書訣父母及天堂諸父老。父老得書。遴弓兵故執役巡檢署者。走訪得之。福基猝見益悲慟。創裂腸斷。臨死猶握弓兵手。厲齒曰。我大清人。殲以大清服。勿效賊爲也。弓兵輿尸行九日。達天堂。面如生。

趙枚不愧其先

趙枚。字子式。邑人也。世居南邑澧溪鎮。祖文哲。官戶部主事。殉金川難。贈光祿寺少卿。父秉淳。任湖北監利令。有政聲。枚生而剛躁善怒。不能容物。每遇權要客。常白眼不與通一語。見田舍翁作富人態。輒漫罵之。又素性落拓。不治生計。中年家漸落。而意氣如故。咸豐辛酉。粵兵陷浙江。破川南。四出焚掠。十二月二十日。賊離鎮僅十餘里。居民紛避。枚安然如平時。越日晨起。家人促之行。枚曰。汝輩惜命。可速去。無煩顧我。衆不復言。稍頃。聞門外奔走聲。繼聞號哭聲。衆出探之。見賊騎已入市。則皆驚遁。而枚獨置若罔聞。旋羣賊至。枚堅坐勿爲動。賊曰。汝何人。枚不答。又問之。曰。汝輩皆小賊。何足與語。速喚賊頭來。我當責以大義。賊怒。拉之行。至一處。已有被擄數十人。